

Aruba Tourism Authority ta honra Simon Gollo

ORANJESTAD – Diaranson durante e apertura di Aruba Symphony Festival & Academy, Aruba Tourism Authority ta honra Simon Gollo.

Un evento cu ta muestra un otro cara di Aruba y cu tin beneficienan sigur di balor agrega, ta e prestigioso Aruba Symphony Festival & Academy. Ya den su di 5 edicion, e festival ta tumando luga for di dia 17 di juli te cu dia 27 di juli. Por a nota riba e prome anochi cu e interes di nos comunidad ta hopi grandi y e variedad amplio di musica cu ta wordo ofreci a wordo ricibi cu un tremendo entusiasmo.

E Aruba Symphony Festival & Academy tawata un soño cu a wordo realisa pa e presidente y director artistico di e festival Simon Gollo. Originalmente di Maracaibo – Venezuela, Gollo a studia musica na Alemania y Suecia. Despues di su estudio el a bolbe su pais natal y a funda Nuevo Mundo Festival & Academy unda el a dirigi pa 12 aña. Debi na e situacion na Venezuela, Gollo a haya su mes forsa pa reloca su evento, na unda el a busca un pais cu lo aprecia e musica pero alabes cu lo ta

cerca di su curason cual ta nos isla Aruba. Diaranson ultimo, durante e apertura oficial di e festival, Gollo a ricibi e reconocimiento di embahador special for di man di Ronella Tjin Asjoe-Croes – CEO di Aruba Tourism Authority, pa su tantísimo bishitanan na Aruba, pero principalmente pa su contribucion inmenso na nos comunidad. Tjin Asjoe-Croes ta aña: "Semper ta un placer pa reconoce esunnan cu ta bishita nos isla regularmente y ta mas placer ainda ora bo ta ripara cu e personanan aki ta muestra nan aprecio pa nos isla den diferente manera, y ta bay un tiki mas leu pa ora ta trata nan dedicacion y kico nan ta haci pa Aruba."

Simon Gollo tin casi 15 aña ta bishita nos isla y a contribui grandemente na nos enseñansa musical, ofreciendo conciertonan y yudando cu donacionnan na e Aruba Scholarship Foundation. Ademas di esaki, el a duna les gratuitamente mientras cu e tawata biaha rond mundo pa duna concierto. A.T.A. ta duna su sosten na eventonan manera esaki, mirando cu e ta algo no solamente bon pa nos comunidad, cultura y desaroyo pero tambe ta un



evento atractivo pa nos bishitantenan y ta permiti pa nan mira un otro cara di nos destinacion." Cu e festivalnan aki, Gollo su meta ta entre otro pa Aruba por sirbi como un centro musical internacional y alabes un portal cultural. E participantenan musico cu a wordo atrae ta entre otro di Inglaterra, Venezuela, Brasil, Colombia Suecia, China, Argentina y Merca. Aruba Symphony Festival & Academy su programa ta inclui 10 concierto cu musica hopi varia, na diferente sitio rond Aruba cual tur ta entrada gratis y solamente e ultimo anochi ta paga pa entrada.